



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Setembru 2011
Edisaun : 06 Setembru 2011

**Loron 6 Setembru:
Masakre Igreja Suai: Justisa nafatin dook husi vítima sira**

Loron 06 fulan Setembru nu'udar loron 'tristeza' ba akontementu 'masakre Igreja Suai' ne'ebé komete husi milísia Laksaur ne'ebé hetan apoiu husi Militar Indonézia halo atake no komete asasinadu kontra povu sivíl sira ne'ebé subar-aan iha Igreja Suai hodi rezulta padre nain tolu no povu inosente kuaze 200 mate no kanek iha fatin refere.

'Masakre Suai' hanesan masakre ida husi masakre sira seluk ne'ebé milisia no militar Indonézia lansa depoisde anúnsia rezultadu referendum ne'ebé lidera no kontrola husi Misaun ONU iha Timór Léste iha tinan – 1999.

Akontesimentu ne'e konta nu'udar parte ida husi istória luta no terus povu Timór Léste nian ne'ebé partensia ba prosesu naruk antes to'o ba ukun rasik aan. Akontesimentu hirak ne'e tenki kontinua hanoin atu hamoris nafatin espíritu nasionalismu no hanoin konabá vítima sira nia espetativa ba justisa.

Dalabarak ona ita rona husi polítiku ka autóridade Estadu sira katak povu sira, haluha ona justisa no hakarak deit dezenvolvimentu; infraestrutura, estrada no ahi, edukasaun no sel-seluk tan. Tanbá ne'e, estadu sempre buka meuz oi-oin atu hasés tiha agenda justisa no impoin agenda dezenvolvimentu ne'ebé mós to'o agora sei dook husi realidade povu nian.

Libertasaun Milísia Maternus Bere, milísia hanesan segundu komandante ne'ebé koñesidu ba kazu masakre Suai nian iha loron 30 fulan Agostu 2009, nu'udar ezemplu konkretu ba pozisaun polítika Estadu nian konabá justisa ba kazu pasadu sira.

JSMP kontinua dúvida katak vítima no família sira haluha ona pasadu la-kohi ona atu ejize justisa ba esperiensa moruk ne'ebé sira atravesa antes to'o mai ukun rasik aan. JSMP fiar katak, mesmu sira kolen tanbá la iha vontade no serteza husi polítiku nain sira ba justisa, maibé iha sira nia laran sira nafatin hein katak loron ruma justisa bele to'o ba sira, iha kualker forma ka maneira. Povu no vítima violasaun direituz umanus pasadu sira, hot-hotu fiar katak relasaun diplomatiku no bilateral ho Indonézia tenke kontinua hametin, maibé ne'e la signifika atu sakrifika sira nia direitu ba justisa.

JSMP hanoin katak katak Povu Timór Léste tomak, liu-liu vítima no família vítima iha direitu hodi kontinua ejize ba Estadu atu Estadu nafatin tau matan ba masakre ne'e hodi husu Indonézia nia responsabilidade ba krime ne'ebé nia elementu sira komete durante okupasaun Indonézia nian iha Timór Léste inklui masakre ne'ebé akontese iha Igreja Suai.

Hanesan ita hotu hatene katak tinan sanulu liu ona Timór Léste hetan ninia independensia, povu Timór Léste liu-liu vítima no família vítima, oan kiak no feto faluk sira kontinua ejize atu bele iha justisa, lia loos no ejize hodi autór prinsipál sira bele resposponabiliza ba krime sira ne'ebé sira komete.

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Telefone: (+670) 3323883/7295795